

四庫全書

集部

欽定四庫全書

集部

石初集卷一至四

詳校官檢討_臣德生

中書_臣劉源溥覆勘

覆校官中書_臣朱鈐

校對官學正_臣卜惟吉

謄錄監生_臣許蔭培

謄錄監生_臣張同履

欽定四庫全書

集部五

石初集

別集類四元

提要

臣等謹按石初集十卷元周霆震撰霆震字亨遠安成人以先世居石門田西自號石田子初省其文則曰石初早年刻意學問多從宋諸遺老遊得其緒論延祐中行科舉法再試不售遂杜門專意詩古文是集為廬陵

晏壁所編集後行狀誌銘之屬亦壁所附也
霆震生於前至正二十九年壬辰卒於明洪
武二十年己未年八十有八親見元代之盛
又親見元代之亡故其詩憂時傷亂感憤至
深如二月十六日青兵逼城古金城謠李潯
陽死節歌兵前鼓農謠杜鵑行過玉城砦城
關西郡城高人食人延平龍劍歌寇至雜咏
寇自北來軍中苦樂謠宿州歌諸篇並敘述

亂離沈痛酸楚使異代尚如見其情狀昔汪
元量水雲集論者謂宋末之詩史靈震此集
其亦元末之詩史歟乾隆四十一年十月恭
校上

總纂官臣紀昀

臣

陸錫熊

臣

孫士毅

總校官

臣

陸費墀

欽定四庫全書

提要

欽定四庫全書

集部五

石初集目錄

別集類四元

卷一

五言古詩

卷二

七言古詩上

卷三

七言古詩下

卷四

五言律詩

卷五

五言絕句

七言絕句

卷六

序

卷七

記

卷八

志

銘

卷九

傳

說

題跋上

卷十

題跋下

贊

祭文

欽定四庫全書

石初集卷一

元 周霆震 撰

五言古詩

美人昔燕趙

美人昔燕趙歲久江漢間
軒窗聚明霞被服羅綺紈
顏怒恒自持含意詎敢攀
一朝強暴陵相從即懽顏
傾身作歌舞豫恐思意闌
新聲與嬌態取媚巧百端
主家隔風塵庭宇深且完
豈無昔共處永夜青燈寒
魂夢各所

依寧復相往還沉沉九秋霜履屨思蒹葭娟娟中天月
照影留空山盛時槩無虞末路良獨難棄置勿重陳使
人摧肺肝

濯濯江漢女

濯濯江漢女幽貞出良家十年守空幃夫婿天之涯良
夜秉明燭悉心務絲麻憶昨秋風起河洛昏塵沙傷彼
朱絲絃逸響趨淫哇朝為御溝柳莫作陌上花世態固
應爾委置勿復嗟所悲在新春雨露凝朝華感此深閉

門淵冰慮彌加歲玉萬仞岡守護盤龍蛇投珠千頃波
光燄驚魚鰕夫壻會有期豈問歲月賒寸心如皦日終
始宜無瑕

燕山萬里雪

燕山萬里雪不作黃河水玄德專所司曷為失其憑赤
雲竊乘間遂逐炎風興連延土山焦反更繁青蠅毛魚
列饕餮臭腐日以升裡祀古有嚴孰與存芳馨昨夢觀
園丘玉輅蒼龍乘正氣六合周瑞花反嚴凝坐見昆岡

火瞬息投溜澠願言哀江南盡洗毒霧蒸

潮生浙江白

潮生浙江白積水何其多悠悠子胥魂千古終不磨東
南溢潢潦汙瀆紛旁羅獨此障百川晝夜激海波力排
坤軸轉正氣通天河從星趣好雨浴日陽之阿蒼蒼紫
微垣弁冕鏘鳴珂宜蒙湛露恩領袖湔甲戈雲陣聲萬
雷銀山勢嵯峨吹噓蛟龍翔奮起驅鯨鼉功推五行首
朝宗諒無他

種瓜南山下

種瓜南山下實晚霜落之冒寒拾瓜仁生意或在茲
收藏篋笥中恒恐鼠蠹窺羣兒顧竊笑癡絕將奚為
昨聞北里富晨厭甘肥禍機隱驕溢瞬息靡子遺
嗟我食無肉藜藿每晏炊俟時啓包裹瓜地審所宜
殷勤謝春雨庶以忘朝飢

十五紀懷

止酒已多日當秋病連綿一窓此寄傲晏起仍早眠
豈

不念佳節負此明月圓叩門客語我蚤作星尚懸白氣
出東北橫貫西南天夜涼步中庭所見還依然力疾起
語客喪亂今十年謂天蓋無情垂象在目前謂天其有
知吉語皆虛傳未遑悉吳越況敢談幽燕須臾報軍出
明日攻富田焚掠先近郊斬艾無愚賢咫尺成俘囚妻
子疇能全戒客姑罷休世事從推遷客去深掩耳閉關
涕潛焉

大風發屋雨雹交集

大風西北來屋瓦去如走麗譙雙闕壯關鍵決樞紐蒼
蒼泮宮栢枝葉互紛糾移時折偃蹇巧力無措手西禪
鐵浮圖摧仆如拉朽臨江戰樓飛夾巷坊額剖恍疑會
羣龍奮發交怒吼泰山恐崩裂寧復計培塿老夫閉門
卧雨電散窓牖倉皇正衣冠力疾坐良久天威俄咫尺
性命亦何有默悟貴存心淵氷慎吾守

歲莫東張梅間

憶昔慕遠遊朝華沐春露焉知喪亂後林杪秋葉蠹間

關西州門寒日收
踽步尚餘平生友
示我廣平賦耿耿
河漢輝幽幽冰雪
度終慚媚求悅寧
悔貞取妬朗吟發
孤音明月落庭戶
世事殊未涯歲年
忽云莫有美君子
心永言金石固

除夜書懷

一榻陋容膝老身兀枯株
淹留恒鮮惊況茲歲云徂
兒女雖苟完喪亂多異居
同也久鄉曲奔走一飯驅
鳳也妻女累近亦反故廬
拙謀康最少甥館橫溪隅
阿巽孀

七載忍棄吳氏孤，覲家食指繁。績維勤養姑，市廛病株
守環偶。錐刀趨顧我，此相守出入。孫符俱孩烏，頗機警
戲弄。聊與娛止酒，動經年宿病。無由祛晚餐，率減半夜
枕。氣始舒宴遊，多却避禮節。那能拘親友，既少存存者
亦暗踈。駸駸齒髮敝，勉勉筋力餘。撫事百感集，來歲知
何如。存亡且未測，艱苦焉足虞。骨肉姑眼前，開懷盡斯
須。地爐熟春茶，明燭散鬱紆。忽憶孤山夢，風雪隨吟驢。
梅花千載心，皎若滄海珠。服之配明月，閱時終無渝。

和蕭仲儀

十年樹桑柘結屋山澗旁辛苦蠶絲成將備公子裳緇
塵一朝起冠蓋紛動勦飄零落綺紈翕忽歸渺茫鮮鮮
皮弁服搖曳凌空翔感此桑下心臨風時自傷

招隱

衰年際時艱屏居謝輪蹄學圃事雖晚披荒漸成蹊焚
夷敢辭勞常恐滋蔓迷夜氣方油然養生無端倪雜蔬
雨意綠籬落新筍齊攝衣晨理髮好鳥當戶啼物情適

自如睠言契幽棲干戈且未息童稚憂提攜外美奚足
多澹泊恬朝輦援琴思南風濯纓鑑清溪白雲乃吾友
延佇蒼山西

暮春述懷

三月十二日寇據郡城勢焰虛張人情洶洶水東民
義廉得其微突起奮擊迎郡侯收復城池殺獲垂盡
餘衆遁去

妖氛被東南醜類日響應承平七十載倉卒駭觀聽堂

堂忠節邦奕奕守與命流血動成川分奔馬蹄競羣兇
首被赤心額雙懸鏡赤以欺愚庸鏡以眩昏瞋張皇禮
像設誑托西方聖燒蠟動千斤相承勢彌盛喧呼短兵
接迅若斤斧運殺人先剖心剝腹扶肝腎攬撫窮害藏
備網羅機穽官曹列廐牧民屋委灰燼郡治歌舞場朋
從悉梟獍頗聞連騎出近郭更蹂躪計程倏往還日以
嚴示信距城此雖遠疇敢保安靜聞雞心即危過午魂
始定顛連混冤親跋涉無老病晨興不遑夕永日飢餐

併豈復虞道途所悲室懸磬妻孥且目下僥倖須臾命
近傳某澤中逆料絕窺偵兒啼誤失聲掩捕一朝盡回
頭顧童穉反覆深砭訂事會固叵量寧能忘戒訓因思
少壯日膏澤溥涵泳冠蓋先送迎農桑雜歌詠閭閻飫
梁肉廝養翹車乘飛潛偕動植一一遂天性焉知厄遭
遇垂老百憂並聖朝果何負姦宄妄依凭得非湛恩隆
竊祿隱讒佞貪冒遞相蒙浸淫成此釁中天揚日月光
彩爛相映雲霧偶晦冥何能滋疾疢衆心一此理磨濯

光愈瑩化機默田旋民伍奮豪俊川東事大奇氣與北
風勁劃開聚石圖捲入背水陣翩然破竹勢節解自迎
刃郡侯起收集轉盼復歸正誓將掃餘孽側耳四方靖
麥秋告登場秔稻亦已竟死者可勝哀存者聊自慶蕭
條舊邑里庶免憂釜甌書生守衡茆才具非濟勝中宵
投袂起踴躍歌解慍四顧掃晷霾如疾脫危證親知稍
慰藉松菊尚三徑雨露極昭蘇草茅微報稱忠謀慮或
過深計衆多屏薰蕕絢疑似玉石互緇磷吏弊襲貪殘

罕由慈惠進吾侯新涉難庶務職其柄撫定在哀矜勗
哉慎行政

清明

憂懷不知春病雨門日閉今晨又清明倏忽如夢寐茫
茫宇宙間擾擾干戈際寥寥邑里舊莽莽身首異悲風
起平原鬼泣海為淚萬死天不墳沉論弔與祭先塋顧
非遠跬步涉疑畏雨露日夜深蔓草青繞地孤生髮種
種去日已川逝旦暮未可知何時及來歲凄然心自割

俯仰寧不愧野人或典衣強欲存節意邀我坐茅簷未
酌意先醉豈無閒花草黯慘不成媚興闌村鼓急鄰犬
衆驚吠天運夫何如臨風獨三喟

騎曲

府辟副監州不查吾監郡中憲公之從子也騎射絕
人部伍嚴整身先士卒所向崩摧惜其巡歷匆匆功
弗克竟

步行擁千夫不敵單騎戰躍馬奮戈矛何如馬頭箭壯

哉副監州巡歷迅飛電秋毫戒侵掠追捕身獨先彌年
賊氣驕膽落驚未見借我一月留坐使民居奠

殘髮

殘髮不可紒晨興日加梳顧慙雨露沐此豈冠冕徒夜
來秋風深傲兀驚頭顱亂離亦已極時序復易徂青燈
一斗酒不樂將何如

莫折草間葵

莫折草間葵葵根朝露深朝露思豈私中有向日心衆

草濫生意延緣托幽陰幽陰人迹稀孤虺交相尋我行
偶徘徊海色微穿林玩葵試披草露氣俄滿襟葵心苦
不多其柰蔓草何

哀枉

春心注成漣晝夜深長育枯梢晴自芳寒燒雨仍綠如
何冤死魂不及閒草木

送曠伯達歸洪

伯子郡中彥移居久洪州才宜當路知濟勝偕名流皎

如明月珠瑩若狐白裘含章澹中懷清識雅好脩顧瞻
桑與梓賦詠忘淹留干戈迫歲晏遠道妻孥憂朔風吹
征衣日落江上舟願言桑梓心江水深悠悠

嘗艱

平世隱大姦禍起連干戈紛紛殺戮餘轉徙嬰札瘥喪
氛不可望散漫翻洪波號呼遶漸染瞬息俱滅磨向來
膏粱子被服華綺羅管蒯條纏裹委棄山之阿顧匪金
石交厄會其柰何吾貧老環堵與世常蹉跎況此災患

林屏蔽謝經過晨夕堅苦淡分安志無他闔門或苟全
天賜良以多有時誦陳編桂竹供婆婆後日將焉知且
復託永歌

晨出

仲夏沐時雨清晨步郊墟平疇日以綠民瘼其或蘓回
頭語田父努力勤耕鋤我朝世忠厚品彙均涵濡盜賊
妄干紀旦夕當殄除曠劫滄海深幸茲邇平途爾曹活
餘息詎識勞廟謨稽首萬億年無疆壽皇圖

二月十六日晚青兵逼城紅不戰而潰暫匿近
壕小屋夕走橫溪

孤藩酣春霖戰艦一時集喧呼驚棄甲填道戈可拾黃
昏烟燄起近郭俛藏蟄夜深相隨行問道衆岌岌敗走
餘小醜邪徑俄掩襲叫號互失亡顛仆免繫繫策羸叟
狼顧襁孺婦飲泣帶褌衣苟完靴沾足難給相失但聞
聲疑路翻却立屢休幸雞鳴襟袖寒氣濕貫魚累童稚
前阻後惶急縈回阡陌間恒恐追騎及重岡釋心掉湛

若恩露裛推挽達人烟開顏見春汲兒扶集悲喜

如兒贊橫

溪蕭氏

親故走迎揖坐定飢渴生酒漿更勸挹驚魂久徐

定強笑寄於悵翻思墮危機性命在呼吸家鄉固殘毀
所幸存井邑杖策歸去來戒此輕出入

寄朱玉林蕙東蕭孟敬仲儀

清商泛空曠肅此林下廬中有學仙子佩服明月珠泯
然樵牧間乃與螢燭俱南隣隱抱璞世守甘自愚孟也
亮以質仲也淵而姝千金發竒觀邂逅意不殊攬結誓

綢繆幽貞諒無渝物情貴眩鬻惡意時所趨煌煌席上
珍待價當何如

停雲師友吟

親友吳彥章客廬陵井岡高氏五十年貴逢志翔允
脩希良凡四世其初客也允脩未生暨脩子有室始
終靡它彥章死惟一孫喪明允脩家亦落猶惓惓念
之此停雲師友吟之所以作也停雲其館客之所

親友吳彥章居鄉衆稱賢早從高氏客晚暮交益堅當

其遇合初志翔方盛年圖南文治開宦轍首着鞭

志翔南雄

路教授

貴逢淳厚風種善猶力田允脩時未生兆已占爪

綿脩今垂五十行且開曾玄俯仰歷四世殆若絲糾纏
往者風塵昏沴氣滋蔓延奄忽彥章翁父子偕重泉孤
孫惟子剛憔悴目疾牽相依幸老母二幼嗟纍然去年
屬大饑雨冷萬竈烟溝壑無貴賤骨肉甘棄捐顧此凋
瘵餘詎敢自意全允脩奮衣起為義吾所先吾師遂泯
沒吾分愧老天耿耿吾寸心永矢徵逝川雖非力有餘

此志必勉旃提攜竟全活如正大廈顛如煎續絃膠如

拯溺九淵愛深不自足遠慮尤惓惓今茲掃停雲致客

禮貌虔

子剛無目就養館中復延客訓其子

從容語二子剛也予周旋息

雖今十齡於我勗簡編教養俾成立吾責始息肩歡欣

揖其來席以廣厦羶父也酬翰墨兒也趨誦絃匡持每

多方苦語精磨研油然古人心如出未亂前吁嗟取友

難邇日義愈愆西華衣葛帔論交憤莫宣叔教賣薪兒

性命優孟懸紛紜落窵石舞智馳輕儇高堂尊面諛千

金肆華筵芳馨意所使陸海羅珍鮮厭飲減獲曹出入
車馬填故人子若孫往往憂患煎十步九頻蹶飢寒日
顛連眉攢若將浼況望引手援懿哉吾允脩古道今其
專峨峨路邊石已俟來者鐫力行庶終惠益永世契緣
眼中富交遊落筆詞爭妍片言倘終靳高誼誰當傳維
昔我彥章停雲硯席聯折花春日吟聽雨秋夕眠焉知
曠大劫夢幻情事遷淒涼餘白髮顧影深自憐安得同
心人和我師友篇

紀病

干戈餘劫數邑里衆死亡楚氛日晦蒙恍若初望洋況
能辨玉石狼顧駭且僵哀哉疇能違付此烈焰場呼噓
蔓親隣苦毒煩中腸老妻卧沉沉念我新著床喚起趣
湯藥翼我期壽康寧復憂其危且為我周防卜稽倏遇
困卦兆非禎祥妻命竟莫逃苦語應難忘提攜乳下孫
戲弄每在傍相從絕可憐溘先朝露翔我時屬方劇飲
恨神慘傷棺斂付兒曹草草歸山岡逝者忍長痛來日

仍巨量闔門罄委頓形勢尤倉皇幸天垂至仁坐覩日月
光諸兒遂遄起再拜酬穹蒼目前強自慰藥物資先
嘗老身僅一息骨立勉自強屢危迄就理所賴醫士良
服餌逾十旬餅餌竭儲藏扶持力更無舉體皆瘡瘍脾
胃苦易侵滋味多所妨冥冥等縲囚兀兀類耄荒推殘
甘委棄感憤涕泗滂夜來秋日夢神氣殊飛揚起坐不
成寐意與西風長願言借吹噓濯髮晞扶桑

石初集卷一

欽定四庫全書

石初集卷二

元 周寔震 撰

七言古詩

古今城謠

井序

國家承平百年武備寢弛盜發徐潁熾于漢淮武昌
南紀雄藩一旦灰滅洪省堅壁冠蔓延諸郡水陸犬
牙北來名將相繼道殞丞相出督步騎直抵高郵事
垂成以讒廢方面多貴游子弟貪鄙庸才漫不省君

臣大義草芥吾民虛張戰功肆意罔上誅求寃濫慘酷百端重以吏習舞文旁羅鷹犬意所欲陷即誣與賊通其弊有不忍言者間存一二廉介則又矜獨斷昧遠圖坐失機會民日以敝盜日以滋廬壽舒三州屏蔽上流廬壽既沒舒獨當鋒鏑之衝至正十年壬申進士余闕以淮西元帥之節來鎮廣設方略招徠補葺備戰守豐軍儲賊飲恨不得逞朝廷嘉其功授淮南叅知政事自是日與賊遇受圍凡四十有二日大

小二百餘戰江西賴以苟安坐視弗援十六年冬別
將胡敗沒漏師明年春紅巾海天鵝數千艘突入內
柵公率衆殊死戰奪其船降數千人斬首千餘級寇
慙憤引卻九月復至出戰不利四面攻圍雲梯登城
城上壓以木石死者甚衆伏兵又擊殺數百人賊懼
謀退謀知城中糧盡益急攻十八年正月丙午城遂
陷公一門爭先赴死闔郡無一生降賊黨舉手加額
稱余元帥天下一人購得其尸城下池中禮葬之傷

哉寄痛哭於長歌使後人哀也公西夏世家字廷心
貌不逾中人當紀綱廢弛之餘治郡立朝每與衆異
故其樹立如此

崑崙烈風撼坤軸日車斂轡咸池浴六龍飲渴呼不聞
赤螳玄蠶厭人肉荆襄弗支廬壽孤江東掃地如摧枯
忠臣當代誰第一七載舒州天下無東南此地關形勝
天柱之峯屹千仞當年赤壁走曹瞞天為孫吳產公瑾
我公千載遥相望崎嶇恒以弱擊強孤城大小二百戰

食盡北拜天無光當關援劍蒼龍吼盡室肯污姦黨手
推鋒闔郡無生降群盜言之皆稽首堂堂省憲羅公卿
建官分閫日募兵哀哉坐視無寸策遂使流血西江平
向來不曉皇穹意名將南征死相繼一時貪暴聚庸才
玩寇偷安饗富貴河流浩浩龍門西燕山萬騎攢霜蹄
英雄暴骨心未死去作海色催朝鷄玉衣飛舞空中見
大息孤忠鏖百戰五陵元氣待天還睢陽誰續中丞傳

斷臂吟

黃埃兒啼夫死官倦投逆旅心骨酸深閨玉臂辱污賤
引斧落之身始安紛紛五季窮爭戰迎送君臣如驛傳
天將人紀付女英貞節特從倉卒見傷哉殘形忍顧雛
飲血仰天弔影孤間關慟絕妾薄命行止隨地哀故夫
征衣屢浣憂泥污魂招不來迫曛莫妾心自割臂可捐
腸斷從夫去時路殘雲低空沒栖烏落月不照秋桑枯
泉流出山誓終始取義寧顧千金軀妾悲望鄉淚頻滴
兒戀母懷啼繞膝一心抱恨向青天他日山頭願為石

武昌柳

武昌柳青如許舊恨新愁千萬縷
宮鶯去盡野鴉栖樵悴江南誰是主
朔風一夕捲栖鴉春日鶯啼憶舊家
流落王孫重繫馬雨晴天氣屬楊花

代答高君寫贈老檜圖

江東老檜天下奇雪霜鍊骨知者誰
幹通碧漢星斗垂野鶴夜過翻雲旗
根吐元氣春淋漓蟄龍守護防顛危
黑風曠劫海倒吹六合草木紛離披
偉哉傲兀永奠基

造化留此持坤維高侯畫逼鄭與祁熟視眼空超等夷
氣酣落筆天自隨恍若曲阜林中移崔嵬樛枝蒼蘚皮
古藤蔓引恠石歌卷舒坐右乃所宜持贈老拙夫何為
秘藏韜櫝時一窺夜中神彩光陸離按圖求索吁然疑
被之寶瑟同鼎彝紫霄鸞鳳若可期變化詎容螻螳欺
扶桑萬丈開晴曦特立丹心朝帝畿

代作暘谷丹室

扶桑之境滄溟通六龍整駕朝王宮大明皇道自茲始

天開暘谷嶧夷東方春萬物盡妍美發生疊疊來無窮
誰與歛之就一室欲與造化爭成功空虛庭除納草莽
窈窕戶牖基鴻濛金沙伏火夜氣碧紫霧升非朝光紅
乾坤闔闢在方寸收拾生意歸壺中從容得之乃吾友
秘旨定傳河上翁拄杖敲門慎勿厭與子一笑論參同
李潯陽死節歌

李侯治潯陽之二載紅巾賊發斬黃倚蔡醜為聲援
勢浸逼郡數告急于省省議調兵武昌興國相繼沒

南北道梗潯陽危侯力疾獎率民義誓不與賊俱生
郡將悉所部先遁侯轉戰力盡猶持短兵奮擊慷慨
指天父子同遇害嗚呼李侯可謂仁義之勇矣彼滔
滔者獨何心哉侯家潁川名黼字子威曾祖而下仕
皆通顯發身監學泰定丙寅鄉試魁上都丁卯進士
第一死節壬辰春年五十有六

蜀川會漢投匡廬潯陽之厄江西樞李侯仗節忠貫日
存沒誓與城池俱夫何郡將弛練卒世祿忍負私其軀

寇來談笑啓闕遁坐使邑井成邱墟侯時力疾短兵奮
臣首當血心當刳魂歸謁帝慟伏闕塗地肝腦民何辜
臣衷願滙付渠答臣首欲飛宜僕姑誓堅洪壁殲衆醜
却掃淮蔡匡全吳黃塵四低黑風淡赤豹騰駕蒼虬呼
山川幾刼鑄英氣上遡古昔誰其徒平原汗馬河北重
江淮按堵睢陽孤顏張凜凜心未死迫立千載誠相孚
況聞有子殊激烈義在從父輕頭顱石頭之表姑孰卞
兩間忠孝何時無紛紛賣降與棄甲仰視汗喘呀長吁

推公蓋自元氣立顧盼所取皆詩書當年射策首多士
已分一念舍無渝勗哉謀國慎所托古今大勇惟真儒

豫章吟

蔡穎構逆掩襄披淮蘄黃響應武昌巨鎮灰滅一朝
順流而東指顧間無江西矣有大臣平章公道通盡
忠報國左丞致事章已延赴難多智練兵二三才賢
相與協謀匡贊守禦備周賊銳攻城屢進屢劓凡五
十有四日竟底散亡戰船千艘無一返馬步幾空蓋

自竊發以來未遇堅敵至此方知國家有人氣塞不
敢復肆郡縣克復恃以心安不世出之奇功也不可
以不述作豫章吟

紫袍相國金虎符左丞鐵面虬鬚劫灰飛空海化陸
兩公奮起全洪都武昌路絕荆淮饒秦涼遠隔黃河上
秋風無鴈到江南百戰孤城天下壯承平當日儲兩公
天豈無意生英雄神光夜夜動牛斗彷彿氣與微垣通
九關夢寐傳消息歸來飲馬東湖碧湖邊高士宅歸然

餘韻流風凜如昔山川間氣久封培一時將佐皆英才
相從報國誓終始指顧四遠風雲開功成彝鼎銘千古
廟食他年軼張許北來鞍馬衆羈臣日長來此聽鼙鼓

宜春將軍取印歌

寇逼袁州萬戶某棄印走贛義士彭志凱力戰完城
印失復得七月萬戶自贛還忌其功取印忤意尋殺
之表竟不守作取印歌

宜春將軍虎頭去金印別來不知處故城血戰印通天

飛落彭郎劍鋒住西風匹馬將軍歸悲陵取印藏禍機
彭郎性命賤於土義士投甲無光輝印乎涉難羞含垢
我欲勸君一杯酒天閭可叩飛訴冤歸來却取將軍首

孤隼歎

變理俞詢河西人白衣受府辟以統軍經歷來壁吾
鄉州同知托歡達實密者貪冒喪師律當坐徼倖以
賂免營求繼至故撓其權迫使他去挾姦吏玩寇營
私民稍自給者不幸為吏所知即中以奇禍盡覆其

家慨思變理不可已變理廉而文工水墨慷慨自負
惜武略非所長

河西萬里來孤隼側目烟埃心未逞點臬自詭產陰山
失勢包羞苟逃命咄哉隼去臬獨留引類呼儔肆殘忍
毒蛇見面即喚名恠蟲含沙工射影十家屏息九杜門
恨不移居托胥井梟鳴饒肉羣飛翔草間狐兔儘陸梁
細思物極理當反安得儀鳳鳴朝陽嗚呼安得儀鳳鳴
朝陽

征西謠

邑同知線去歲領兵西行嗜利深入寇垂險迫之委
其衆奔還義丁積骸遍野存者十無二三郡吏受賕
舞文未減其罪今復承檄來南賂吏之貲悉取償焉
去年征西喪師旅暮夜懷金首如鼠吏姦嗜賄務欺瞞
僉謂罪疑兵氣沮一官失律忍致刑萬夫性命何其輕
羣邪逞志忠義屈無恠寇至無堅城今茲又復遷南戍
漁獵編氓償宿負紛紛行伍被餘風迎望賊旗盡回顧

竊聞上方龍劍昨哀鳴為我提此斬血官街淋併取貪吏剗其心

兵前鼓

朝衙捺撾出近午暮歸斷續卒三伍鼓聲抵以迎送神漫把旗旄揭飛虎鋒交昨者沒旗頭今晨隊長血髑髏貴人按轡不為動但訝日食無珍羞

領兵官晏出早還鄉人多以供頓弗

備受責

戎徒抵掌羣嘲戲志士拊膺殊奪氣朝朝暮暮鼓

鼙鼙吸膏敲髓了無愧張侯援枹華三周襴衡正色披

今年世間壯士古來有此聲慷慨曾聞不

農謠

萬田草生農務忙飯牛夜半飢且僵侵晨荷耒散阡陌
和買犒軍官取將高堂大嚼飲繼燭持遺妻子豐括囊

官吏飽足之後復以大囊滿貯送至其家

蒼頭廬兒飽欲死義丁疇敢染指

嘗鋤耨謾勞犢方稚十步九頓空彷徨將軍大笑不負
腹東臯南畝從渠荒

牛魚些

東郊服牛秧未移前者掠取稱犒師南湖蓄魚家賈販
昨朝一網俱無遺味甘得計啓貪虐日揣編戶鑽其肌
網羅已徧閭左右根括流寓窮刀錐總兵三月官四易
方春殆若秋慘悽誰能反此思報國建功何事不肯為

和劉以耕孤筇吟

以耕一筇二十載屢失復還
寄興長吟和答以廣其意

亂離一飯奔走難柴門長掩白晝閑垂堂有戒古所慎
從教世俗嘲癡頑羨君廿載吟筇友高節曾經遮日手
嶙峋但覺霜滿懷錯落初疑月穿牖顛危必假厚意將

論功掖老殊家鄉化龍縮地托靈物刻鳩祝饒頒明堂
晴泥暫屈溪橋去布襪青鞋尋別墅詩成緩步藉敲門
飛落梅香殘雪處平生密物拄嬖姍去如得之珠浦還
結交自是羞少壯用世要當超險艱秋風古驛三义路
五斗折腰徑須賦百錢留與阮郎看咫尺康莊宜小住
何時花柳滿前川邂逅相倚為忘年提攜有地春未晚
試叩酒家堅宿緣

蕨根歎

園蔬凍芽委邏卒舊穀未春先已沒嗷嗷待哺啼且號
極目山南際山北飛仙絕粒那可致異書鳥跡尤荒忽
短鋤單布霜雪餘起逐蕨根延命脉雞鳴裏飯衆相呼
日晏山深行兀兀窮幽遠取志躋攀冒險旁搜任顛踣
背糧腰僂經信宿陟巘緣岡拾魂魄千夫篝火斷厓陰
夜半風酸毒穿骨手斂棘蔓凌虎穴膽掉巉巘撼龍窟
不憂土痛損春心且慰尫殘蘇頃刻爨灰一旦死復燃
功與堇荼相什伯反思疇昔馬厭穀梁肉沉酣遍減獲

道傍掉臂唾枯朽條達始為樵者得焉知屑玉貯縑繒
春磨殷勤沐膏澤爛然光采升鼎俎白璧黃金皆瓦礫
物情貴賤竟何常慎勿間時輕棄擲

飢相食

轉輸餉官傾富室米石萬錢無處糴連村鬼哭竈沉烟
野攫生人腥血赤九疑對面森可畏弱肉半為強者食
旋風吹棘晝梟鳴缺月銜山虎留跡提攜匕首析戾戾
狼藉剔剜碎燔炙恍疑逆祀禱恣睢復恐老饕儕盜跖

幽幽怨魂忍葬心腐脇穿腸憤無術髑髏抱痛宜有知
上訴帝閤吐冤抑我生白頭駭見此矯首蒼穹淚沾臆
北山有蔽南澗蘋旦暮可湘心匪石青春鳩化逐蒼鷹
黃口蛇吞來義鵲物情感召尚如此同類何辜自相賊
興言使我立廢餐推案拊膺哀奮激鞠囚誰料殞炭甕
立法竟嗟離舍匿後人幾度哀後人萬劫相尋豈終極
昨來偶值隣翁坐且說舟航好消息浙江白粲載如山
相送大軍來有日一朝菜色變歡顏恠事書空自冰釋

送周士能赴都

洛陽花開官酒濃紫衣乘傳春如龍海氛一夕泯無迹
坐致江漢之朝宗君行遠度黃河北北上都門瞻曉色

故人列職省垣深頗念江南老賓客

哈瑪爾未相時貶南安士能以縣典史

出入承奉及赴召歸北其子叔諒從之保入憲臺

況今有子翔亨衢日邊西寄

思親書栢臺晝永閒案牘綵服喜就京華趨送君此去
青雲立太史列卿宜俯拾至尊前席問蒼生何者最為
先務急吏深持律舞貳端縉紳遠迹廉恥間鈞衡於此

金史卷之二
試留意談笑四海俱歡顏

丁馬謠

為丁博斯呼馬噲爾作兵興連歲賄賂公行上功省
垣輒為吏議所抑

控弦飛騎丁無前策名百戶今四年冠鋒如林深冒險
五載軍中馬巡檢翩翩旗尾風雲高醜類聞之潛遁逃
朝家爵賞褒忠義幕府上功從吏議戴天履地皆君恩
小臣分寸何足論

悲東姚

州東姚正叔奮起擊賊不受爵賞一門死事數寇連
歲不得逞志安成正叔力也乙未夏五月遠寇悉銳
而進衡頭衆背正叔潛與寇通間道直抵砦下正叔
麾所部力戰舉旗招援兵監州普剌同知托歡達實
密擁兵咫尺素忌其能衆踴躍求自効二人力遏之
姚死安成陷寇遂根盤姚所居小橋頭過者無不流
涕

吾州姚氏城東營四年殺賊不為名一門忠義死相繼

報國何重身何輕無端毒蛇生肘腋

衛頭之人

噓送黑雲朝

蔽日條鷹咫尺呼不來

監州同知

瞬息東藩失堅壁老姚忠

血赤貫天江南野史何人傳殞身三世匪官守異日合

寘忠臣先郡兵北來思蓄銳羣盜憑城轉無忌請看婦

女與兒童說著姚家總垂淚

布延副使政績歌

壬辰寇陷武昌順流而下省郎中布延布哈諭于衆

曰若其直擣直揚事未可知倘轉而南無能為矣吾
受國厚恩發身監學忝進士先誓死必報遣人間道
馳書奉百金歸別父母建議盡徹城外民居寇始渡
江官軍小衄母弟佛努死之公單騎殿小橋寇不敢
逼衆遂翕從奉平章公道通左丞章巴延竭志守城
逆黨雲集攻圍五十有四日大敗而還散亡畧盡江
南遂為天下雄非公長才贊畫平章左丞聽用其言
詎至是哉朝廷論功除本道廉訪副使於是公之惠

愈無窮矣遠近士大夫作為公歌詩誦其美侯太史氏擇焉公世家山東希古其字也邑士劉子真近歸自洪具道本末如此

近時有客湖上歸能話郎中身許國朝廷取士數十年誰謂書生無寸策江州李侯死可書郎中百戰全洪都昔年廷對俱第一鸞鳳固與羣飛殊當其練兵首陳義謂賊南征非所忌環城徹屋民始疑事急方知為上計家書間道馳山東百金歸報壽乃翁小臣於此誓生死

仰視白日昭其忠朔風雲低吹戰血母弟魂歸寶刀折
倉皇勁氣吐寸心立馬危橋萬夫決相臣攬轡從天回
將軍鞞鼓轟春雷為公破敵捐萬死顧盼妖賊如山摧
君王拊髀加褒異深副當年設科意碧霄雨露湛恩深
官轉霜臺弘國器漢廷寥寥渤海龔廣陵張綱尤罕逢
使君宴坐試深省談笑憲府省平戎

石初集卷二

欽定四庫全書

石初集卷三

元 周霆震 撰

七言古詩

杜鵑行哀王孫作也

我不暇自哀古帝魂春來却念今王孫
王孫馬蹄去何處但見黃鶴落日故宇
烟塵昏我昔帝蜀空名存絕憐
王孫玉牒尊春宮天駝壓酥酪凝香夕
帳貂皮溫紫茸
吳姬河西曲白馬集賽鷹條捫居民
咫尺甚天上冠冕

臣僕羣趨奔漢川一炬寇飛度四載寒食如荒村暴骸
泣霜關月老恨血埋雨江波渾投鞭七寶委道側落花
送客慙春恩勸歸我亦久流落幾欲出口聲復吞莫道
人生歸去好江南無復弔王孫

送吳縣丞赴江西省掾并序

至正十有六年春董銓黃昭二尚書暨廉使吳公當
奉詔平戎江西適進士吳師尹永豐秩滿攝廬陵雅
為司徒所察以省掾徵廬陵之民歎息其去余解之

曰師尹攝廬陵信賢矣然化行一邑江西二十有五
路司徒視諸侯王伯仲間朝廷付托之重郡邑觀感
之深舟車轉漕之往來甲兵錢穀之出入一言取知
於上大江以西莫不鼓舞其賜豈獨廬陵哉況今世
變滔滔毅然左衝右潰而不可奪者悉由進士中來
故司徒之用人也郎中布延倡於前而江西遂雄天
下都事吳公奮於後而吾郡之幾殆旋安師尹此舉
雖爵位功業未及二公然常存豈弟之心安知來者

不如今耶甚哉我朝進士得賢之盛司徒之善於用人也微司徒之明不足以取人於進士微進士之盛不足以回天下之太平吾固因師尹之舉有以卜司徒知人之明而進士之不負朝廷也必矣遂歌以述其往俾臨難易節者聞之

大江西上輿圖開繡衣傳詔從天來中書機務政輻輳
贊畫獻替須賢才吳君壯年進士選錯落襟抱皆瓊瑰
攝官縣庭治方洽入掾省署班迺催憶昨初從監郡日

慷慨艱難為時出國恩未報寇縱橫撫字差科殆無術
火災水濕良苦心電激颺馳恒定力吏姦毫髮蔽欺
民瘼顛厓獲蘇息此行誰道案牘輕司徒深堅瑞州城
乘驄憲使榮畫錦尚書列坐分兵刑九重憂顧在宵旰
四方利害推廉明士夫講學待今日勿以富貴移平生
馬蹄佇看長安遍黃河水清喜重見銀箭宵鳴白鴈傳
寶圖曉駕蒼龍獻日繞賓春上林苑花迎謁帝含元殿
燕山佳氣五陵高鳳池早頌櫻桃薦

鬱孤驄馬行

粵自壬辰寇興不覩風憲之巡歷五年矣御史監察
阿爾斯蘭南來列城想望風采既而貪侈日甚廉馬二
監察按臨廣東留鬱孤以待參政金子仁佐之發其
姦籍舟載黃金千凡黷貨之物具載日錄委官押赴
洪都以俟命下忠憤之士相與賦詩以戒來者云

鬱孤臺前江水深繡衣馳傳千黃金翻然按劍起同列

如見咫尺天威臨郡中新參全太守

子仁由郡守陞參政捕起龍

蛇恒赤手從容杯酒示先機談笑拾之如拉朽五年羣
盜靡東南百城黷貨春夢酣堂堂憲府卿相列詎意僚
屬藏姦貪送官檣連鎖晝寂夾道傳呼記來日君恩可
負天可欺投畀北荒豺不食濁河一滴玷濟流共器那
得全薰臈當官而行義所激此舉庶減臺端羞小儒初
心思許國萬事無成頭已白箋天願賜秋風高吹送霜
威遍南北

送武昌馮子中亂後還鄉

東南形勝會武昌蜀江滔滔經漢陽北來冠蓋集如雨
甲第壯似諸侯王平明飛箭馳校獵清夜列燭歌傳觴
貂裘鞍馬美少年春風何處無垂楊一朝平地洒新血
但見落日塵沙黃金章骨折荒草臥玉貌跣泣泥塗僵
嗟哉馮子命一縷顧影錯莫驚鴻翔時從知己話疇昔
留滯五載忘他鄉千金結客心尚在豈效兒女徒悲傷
昨聞湛露被寰宇夢寐桑梓情難忘築城漸喜還漢月
點鬢仍許先吳霜相隨長缺幸無恙况見峻坂成康莊

子孫他日又茲始五世八世天其昌嗟我洪都百戰場
大臣精忠遠有先生靈一道在掌握若泛巨海操龍驤
到家故舊定相問江右何恃全金湯司徒勲業有如此
願子備述毋忽忙

過玉成砦

玉成三面堅如鐵穿井無泉援兵絕去年此際萬人登
已是如今髑髏骨刃飛丁壯屠嬰孩婦女分配囊資財
浪傳古昔險堪恃曠劫竟墮昆明灰我來似涉羊腸坂

道過遺黎拭愁眼故人何處覓遊魂

陳德新主戰曷於永新罵不絕口而死

雲樹鴉啼寒日晚

城闕曲

雞鳴海東黃塵起落日關山氣如水餘民髓竭欲無生
月費給軍須萬計尚書前時來使臣近者太守宴將軍

割鮮飲醇互來往白晝走馬邀紅裙

兵部尚書黃昭奉詔遠出按兵撫建

間其行營經歷伍開章安成醫生也榮遇京師出黃幕下自撫抵吉以督兵為名招權納賂郡守梁水寨都事吳相與玩寇偷安酒食徵逐無虛日殆承平時所未有
布衣小儒寸心赤咄咄書

空長太息閭閻無奈覆盆何帝禁九重方旰食

題奔子溫南城抱關遺藁并序

子溫由丁亥江西乙榜職教旰之南城念幼失所恃
繼祖母恩育之勤別其父廣胖攜妻子奉祖母就養
時辛亥冬也明年兵興出入鞍馬間掌城啓閉甲午
歲大侵殲焉又二年旰經歷孔興之避難來廬陵持
子溫未死前抱關遺藁詩若干首反覆氣化人事哀
怨窮愁歷歷如傳訪其弟子志授之子溫廣胖冢嗣

也余交廣胖四十年其學務博采研精文章不肯泛
泛隨人後試有司連不得志挾其長鳴京師歸亦老
矣於是子溫薦于鄉邑人遂羅致恐後旁郡又或奪
之以往是翁平生讀書效僅爾鍾美必在子溫而壬
辰兵變以來上下隔絕子溫南城哭其妻若子而身
殞祖母莞然後亡廣胖旅殯淒涼家人淪沒殆盡嗚
呼子溫垂絕之日顧祖母白頭異郡割恩不可忍乃
翁弱弟藐然故鄉烟塵中廣胖顛沛連年念老親愛

子幼孫數百里外杳不知存否而抱恨以終死如有
知父祖子孫相見於地下痛當何如哉天之未泯其
傳猶幸有子志在則子溫之錄賴以布於朋友始終
之際因有考焉不然賡志丘原埜草同腐矣余苟全
性命朋輩零落無幾讀子溫抱闕之作重悲廣胖故
託永歌以屬吾子志子志其善自愛庶足慰父兄於
冥冥奔氏一門唯子而已

黑風吹角孤城裏萬竈塵生烟不起白頭祖母骨相隨

天入荒山夜如水惜哉奔子脩程促淚墮人間抱關錄
遊魂歸省父何之旅殯孤村春草綠當年煮字嗟無術
商聲寫入山陽笛餘音似和祁孔賓又似飯牛歌甯戚
蕭蕭霜葉吟邊落有弟零丁此漂泊秋風無地賦招魂
明日城東問歸鶴

海潮吟

北風翻天送高梢西江浪起如海潮千艘平城箭飛雨
城潰曾不煩兵交馮夷啓扉衆爭赴萬棟烟氛畢方怒

司徒命盡撫州營國公
匹馬杉關去
遡流西上
旌旗紅
列城樓櫓轉盼空
干戈七載遍宇內
朝野狼顧無英雄
悲哉上下交征利
四維不張巧蒙蔽
憂來却意賈長沙
痛哭當年繼流涕
豫章逝水通錢塘
漢川北渡趨洛陽
洗日咸池佳氣正
聞雞矯首向扶桑

劉觀復止足軒

陶朱去越乘扁舟
布衣卿相難久留
子房定漢晚辟穀
赤松可學思從遊
此遊意氣空寰宇
家國安危關出處

功成名遂身獨全千駟萬鍾猶一羽如何海桑人白頭
紛紛燭下尋牙籌馬上朝雞聽未了又擬跨鶴趨揚州
壯哉脫穎吾觀復物外一軒名止足風流文彩祖子孫
平生無殆應無辱有時展卷評功臣凌烟上遡筆有神
敲推得句亦妙契直欲三絕追唐人太行覆轍車無數
我獨衡門樂安步紫駝翠釜生野烟我寧晚食依環堵
畏途留此示康莊戲寫陶朱贊子房滿院綠陰春雨歇
客來推戶煮茶香

郡城高

郡城高昔人隳廢今人勞城中居民負土石城上畚鍤

卒伍操去年外壕深地底

吳員外張錄事

今年內城插天起

紅巾

紅旗東接漢陽山白壁西沈潁江水

江參政

杵聲未改築

者殊人事往來如傳車荒碑斷礎悉興致仙宮梵宇空

無餘懽呼攔街走童孺明年移家城裏住抱關舊卒鬢

垂絲淚墮鴉啼城下樹城堅池浚侔金湯此地他年為

戰場

喜雪

庚子臘月初旬雪再作十九日大雪至二十一日彌
甚深可數尺三日乃止辛丑元日早起雪塞門十三
日夜半又雪皆平地尺深喜而賦之

殘年新春凍不開大雪五度漫空來南州病熱已十載
造化有此真奇哉夜聞翔風撼天柱恍惚萬馬隨奔雷
乾坤正氣有先至密運亭毒滋其媒雲旗乍翻搖若木
濤霜却卷飛龍堆女媧廢煉深縮手河伯失據俄驚颶

玄冥振轡祝融遁怒勢欲遣崑岡推臥龍潛蛟起奔走
舞鶴翔鳳爭徘徊瑤池觴罷洒餘瀝漢皋相贈投瓊瑰
蒼山一夕頭盡白貧戶得句侵晨推朱門豈必異衡宇
埋沒弱柳餘枯梅我疑真宰偶戲劇往往玩世如嬰孩
故將空色種天上大巧六出無根荄要令六合反混沌
寧許萬象蒙塵埃兆豐呈瑞悉餘事邂逅淨洗昆明灰
西流壺嶠應自反咫尺清淺移蓬萊內廷稱賀論邊事
坐想勅使傳宣催蔡州鵝池久安堵整頓宇宙須雄才

卷三
涓人自昔負高見遠去求馬何時回燕山從爾深一丈
掃地為築黃金臺

犬雞嘆

雄雞奮翼銜怒蛙蛙被啄取聲咿啞犬來雞斃蛙竟逸
轉步犬驚逢惡蛇兩強相厄須俱殞過客驚怪頻咨嗟
君不見下宮將軍輕杆臼綠珠金谷來孫秀世間萬事
每如斯莫負尊前卅時酒

虎墮井十二月十三日庚寅

神岡距郡十里虎晝攫人轉身竹籬陷入智井衆共殮之

郭西猛虎勢莫當攫人白晝來神岡暗中推墮若有物
智井百尺籬根藏凍泉收聲斃為土轆轤綆斷苔蘚蒼
眼花誤落介牙廢棄置有待摧強梁酸風飛沙寒日黃
四郊流血皆戰場乘時吞噬恒安尾翼以俟鬼高駝翔
北平將軍老且死泰山哭聲哀怨長豈知鑿池古設險
邂逅一蹶由天亡吁嗟此物肆無忌妄意流毒窺城牆

千夫駭汗手莫措造次坎窞侔干將君不見東門狡兔
蹙牽犬西江孽蛟終自成貫盈兆此多未悟來者紛紛
投土囊

人食人

髑髏夜哭天難補曠劫生人半為虎味甘同類日磨牙
腸腹深於北邙土郊關之外衢路傍旦暮反接如驅羊
喧呼衆頤擇肥哉快刀一落爭取將憑陵大嚼剗心燎
競睹兇觥誇飲醕不知劒吼已相隨後日還貽髑髏笑

陰風腐餘犬鼠爭白晝鬼語偕人行銜冤抱痛連死骨
着地春草無由生睢陽愛姬忍喋血長安仇家俊臣古
攄忠疾惡古或聞未覩烹魚互吞滅五雲深處藏飛龍
天路險艱何日通皇心萬一閔遺子再與六合開鴻濛

上營門

上營門外將軍樹幾度春來復春去北轅南旆萬人行
移種東風無定處虔州偽將昧禍機熊遠杖收圍持旌
麾徐臨危走檄盟白馬挾詐志嚙三狡猊孫曾履跼陳

運肘分部拚之憑郊酒羣庸貪餌悉輕生談笑削除天
假手惜哉隣醜疎防閑反更放虎來深山招安成入郡倉皇
出此殆無術民命一髮懸天關老夫厭觀陣雲黑中夜
拊膺談失色古來反覆事難平願天早賜扶桑白

天問補

貝丘豕立俄人啼淮水失却巫支祁萬牛腥聞紅帕首
天狼反被青雲衣塢金遽遣髑髏守日注鬼籙停生機
風塵展轉逾十載意者天怒民澆漓故令六合日顛倒

人類滅盡將無遺云胡玉毀石自若熒惑揚彩三階微
澧蘭無實荃蕙化跼蹐往往嗤隨夷姦凶殘忍源源出
福善禍淫殊反易殺人白晝臨通衢長劒大刀爭割食
東家處子西家樓父母吞聲淚偷滴書生平日苦自信
坐談性命成迂僻有人抱膝吟草廬夜夢史遷紬秘書
共工舉頭天柱折五丁鑿石岷峨枯有窮飛箭落九日
防風戮骨雄專車跨秦歷漢凡幾劫宇宙戲擲猶擣搗
君不見邯鄲空國長平陷又不見焦土咸陽總冤濫區

區反覆焉足云老天為質由來闇

秋宵見月

青天過雨明月佳不飲柰此秋滿懷
援琴屢起却復止音韻惜於同時乖
西風笑我深閉戶吹送亂葉鳴空堦
翩翩從爾千萬態我自作我隨無涯
蓬萊會見清且淺未許泥滓沾青鞋

石言

邑城夏暑增築基宗數尺壘巨石為之搜抉幽遐遠

近煩擾

南山白石堅不朽
鐫磨誓入良工手
平分陞級肅降登
橫臥津梁達奔走
樟成取重侯王家
不惜千金市長久
從渠楚漢決雌雄
坐閱興亡屹相守
寧知敝邑如殘星
十年豺虺喋血腥
今茲成壘方改築
流汗萬杵當炎蒸
城基疊石崇數尺
搜括隱匿憑威刑
斷橋發塚殘寺觀
民舍墮突翻階庭
千夫引綆日馳逐
顛踣道路無留停
石乃言曰我生剛
介根元氣落落孤
高蟠九地既不得

補天遇媧皇又不得填海從精衛包羞轉徙近汚渠反
為姦尤嚴屏蔽何當天威發怒雷豺虺骨與城俱摧此
時飲恨庶吐氣盡碾暴骨為飛灰

反覆吟

東關晝宴宵流血北里暮耕晨建節金珠無脛走如飛
奄忽廢興那忍說君不見青岡頭墓碑云是晉桓脩發
掘近遭羣盜手我疑塚已千秋

埋冤樹

郡城西郊官道側有樹名埋冤往來必於此少息因
賦托興度幾有位者聞而動心焉

出城十里西南去行投經過倦休處崔嵬古幹絡蒼藤
相傳此是埋冤樹樹名那得呼埋冤閱人累歲官道邊
朝吁械繫逮詞訟夕敝鞭扑逋稅錢富豪招權逞濫入
孱弱破家哀子立幾人飲恨淚徹泉樹不能言天為泣
埋冤得名良可悲郡中守令知不知

延平龍劍歌

鄧克明率江西之黨攻延平江州八月破之日鄧亦
大敗奔還失亡甚衆

延平之淵深復深白日下照蒼龍吟古來此處會靈物
中有未死英雄心黑風一夕噓蜃氣坐看海州俱陸沈
咄哉蝮蛇敢流毒鼓召妖孽紛來侵老龍掉尾繞一怒
百恠洒血腥淋淋書生投筆起大叫稽首再拜皇穹臨
龍兮龍兮爾之潛也已千載豐城故鄉昨失守宜叩天
闕勅牛斗下取老蛟心血剖指揮九日付羿弓馳檄風

雷殲巨醜胡乃坐觀潯陽肆鯨鯢魑魅魍魎羣相隨剗
肌剔髓四海靡遂令魚腸豪曹甘毀折岐山之鳳鳴聲
絕忠臣扼腕空白頭赤子腐心眼流血時哉好從檀溪
踴躍起的盧喚取黃熊赤豹來清都并與宋帝獨驅之
長刀龍門將軍天山之三箭神會大治飛昆吾迅掃六
合塵模糊我當遠求華陰土助爾光芒增快覩問天洗
甲挽銀河蘇息蒼生溥霖雨

志感

老來不能夜飲中秋無月靜坐山中因憶往年客橫
溪詩朋盛集老桂初開列坐其下諸生倡酌達旦居
人驚倒聞所未聞重至桂無復存但見平地立馬其
中追念亡友思恭愴焉良久遂成長句奉寄西愚先
生聊志今昔之感丙辰年石初書

海風吹雲通萬里浙江勢合潮聲起酒杯無分月含羞
獨步徘徊桂香裏秋深蕭條晝掩關良夜偶此須臾間
老逢佳節偶懷舊昨者夢自橫溪還溪邊故友重泉隔

却憶當年會騷客十千清酒買城中舒鴈初肥鱸膾白
庭前古桂高婆娑酒酣能賦得月多野人側聽驚絕倒
寧許扣角聲相和重來無處尋高桂夜聽馬嘶林葉墜
淒涼舊曲付吹簫吟斷清高復誰繼我愁問月傾肺肝
月亦憐我霜鬢殘平生取友恒落落會面非少知心難
古今何限西州路送迎只有山如故作詩寄語座中朋
難覓人間許玄度

石初集卷三

欽定四庫全書

石初集卷四

元 周霆震 撰

五言律詩

憂懷

黃落雜烟蕪林炊乍有無
喪氛移步滿兵氣幾時蘇
小邑疲封拜窮鄉落饋輸
劫深資病減閑坐校靈樞

老病

喪亂交遊盡艱難老病深
寥寥平世策落落古人心
夕

照驚岐路晨霜憶故林折腰寧五斗敝帚或千金

山村

寥落驚回首艱危厭久生野人羞費揖山石苦留行坡
雨初畦菜園霜未破橙小村風物古暫喜話農耕

喜康子至

幼兒淹滯劉氏館中夜劫者壞大門而入急呼宿客
父子起走出遇寇二客趨東廂影堂寇追躡之父死
子傷吾兒趨西廂匿神龕側幸免死生之異在毫髮

間於其來也且喜且悲

脫或淪鋒刃吾年豈願餘及今相見日是汝有生初割
愛三兄愧憑危一飯驅風塵方未已尚慎母恩劬

憶第三兒留郡城

百里元非遠三春又已終傳聞隨處有消息幾時通蔓
草酣朝露孤花繫晚風昨逢歸客語前日早趨洪

挽吉水孫碧澗判院

嗣世明經業傳家畫錦衣干戈危獨立桑梓晚全歸遠

戍孤雲淡平原落日微送車淚交洒霜葉不成飛

送人之岳陽稅務

五月巴陵去官途事若何通商川舶遠供貢楚材多澤

國留形勝

湖廣參政阿思蘭駐兵岳陽

騷人續詠歌時逢漁艇問或

有化龍梭

張德彥

德彥自金陵敗中附趙餘黨遡流將抵安慶趙子變

起

其父鎮安慶陳疑其通金陵師行之際戮之

守者倉皇東下德彥同行

識之急投脫命趙舟四十六人皆死歸道所以聞者
悚然

跋涉逾千里存亡間一舟絕憐干祿誤翻致遺親憂水
國寒潮晚山城古木秋行藏盍深省嚮晦度無尤

辛丑除夕

雨雪徂年日乾坤厭亂餘戰爭兵會阻消息朔風虛虎
眩投簪井燐冤集故墟事機恒倚伏天意竟何如

壬寅旦日

衰遲違故里喪亂守殘編
鞍馬兒童習貂璫收圍聯問
春逢上日頒朔憶當年懶復談
迎送焚香校太玄

閔新安

路泣顛微步原塗枕積骸
孫恩將入海

新安砮主
孫本立

李祐

起平淮

紅巾首
李昭

犇潰蛾投火攀援蟻附厓
熊兵聞禁暴

坐覺衆心懷

關隴吟

隴戍通恒代河關控魯齊
日經亡國淡天入戰場低玉

帳千羊酪青郊萬馬蹄悲歌頻勸酒送客去安西

寇至

羣醜發禾川中宵羽檄傳纔收綠岸戍已漲近城烟掠
貨舟相次毆人騎獨先兒孫猶九口兩地寸心懸

雜詠三首

海宇久承平風塵忽四驚官僚生間道黎庶死乘城壯
士天山箭將軍細柳營寥寥千載事憂世與誰評

穎蔡俄中起荆襄轉盼休兵符留北府臣節伏南州萬

宇聲華劫千官富貴羞聖恩覃雨露未必乏嘉猷
所至失堅城宜令鼠輩輕茫茫誰報國草草衆興兵吳
楚懸三戶河山隔上京幾時蘇北望飛騎報塵清

即事

古驛深春雨荒城帶落暉雞豚當道泯烟火隔江微所
過無完室相逢盡短衣干戈承劫運整與聖恩違

羅郭

首義羅明遠傾家郭楚金俊功隨日起遺恨與年深白

日重泉影青天萬古心如何有位者翻不計浮沈

感遇

病髮梳頻減愁根日夜新世方迷貨色天未厭風塵臣
分誰憂國君心本愛民歲寒餘勁草灑血賴江濱

七言律詩

秋日登城

山壓孤城草樹荒西風塵起獨彷徨蕭條遺構重燒毀
憔悴餘民半殺傷驛傳共疑星使杳角聲空引鴈愁長

書生往往談經濟攬轡澄清合有方

答劉持志

關山極目翳黃埃歎息車薪水一杯種秫地荒賓少顧
催租邑小吏頻來暗塵葛服秋當浣細雨柴門晚未開
近日江南吟思減斷腸誰更憶方回

答道原思治

書生報國乏涓埃羞對茱萸強舉杯宿霧連山雄虺叱
朔風何日野鷹來交游漸向艱危盡懷抱那能老病開

幾度出門疑所適杖藜細遶竹西回

雨

五月初七日雨至初九夕大作一晝夜如傾初十夜
半更許方止江漲比丁巳有加

濕雲無際漲痕粘雨勢朝來幾倍添已讓滄溟懷絕島
更輸銀漢建高簷三年兵甲天當洗一日蛟龍地莫淹
早泛賈船隨鬪艦廣通民食富官鹽

寄吳章臥病客中

亂山歧路鴈行斜
籬落酣烟菊自花
我昔郡城行冒雨
君今孤館臥思家
濟時孰是囊中穎
避地除非海上槎
一郡幸存唯二邑
戍樓何日罷吹笳

城陷

黃塵赤日陷城池
又到冰霜歲晏時
列寨守江兵夜戍
揚旗出郭寇朝馳
就梁誤落荒田鴈
啄肉空肥野樹鷄
諸將從容依老守
捷書但奏莫令遲

梁侯守郡
惡聞兵敗

感秋

鬢如踈葉挂林端，帶減腰圍逐月寬。
久病秋深心易怯，多愁夜永夢難安。
暗蛩入戶輸清苦，落月窺牕進薄寒。
屈指青春平野望，東風隨意馬頭看。

九日

西風慘淡郡城樓，誰復黃花插滿頭。
訪舊愁經墟落晚，登高怕見戰場秋。
鳴鸞閣在金笳集，戲馬臺空鳥鼠留。
尙欲遠尋雷煥友，提携雙劍出南州。

荒荒萸菊負登臨，莽莽乾坤亘古今。
淮浪逆舟寒日淡，

楚山連戍暮雲深孤生自滴思親淚

先父宋淳祐九年九月九日生

難誰攄報國心道路幾時辭逆旅關河無地避秋砧

送韓一初赴馬萬戶府叅議

才俊宜從幕府升四郊何日保安寧連營未報休傳箭
策馬何嫌出戴星苦戰城壕霜月白屢殘村落野烟青
軍民甚有關心處佐政行看刃發硎

登城

世祖艱難德澤深風悲城郭怕登臨九朝天下俄川決

七載江南竟陸沉
馬首空傳當日價
雞聲不到暮年心
雨關門外青青草
過客魂消淚滿襟

民哀

痛哭羣庸誤主恩
遺民無路叩天閭
荒涼甲第有焦土
倉卒深閨無固門
青血傳餐供士卒
黃金為土贖兒孫
囊膠誰造崑崙頂
念此長河駭浪渾

除夜感念亡室

無復憐余踏雪回
一燈兒女促行盃
土寒深痛骨委絕

月暗忽迷魂去來遲暮影孱如欲踣顛危心死不成哀
鬢邊種種君知否消得流年幾度催

中秋

夢遶霓裳世外音漢宮天老桂香沈黃埃欲出飛鳶上
白骨猶如落葉深萬國砧聲離別淚中宵月色太平心
晉公相業何時見目斷天津益苦吟

風雨重陽

八載兵戈苦未休異鄉佳節若為酬鷹臺人化前千載

鴈塞書沈外九州風雨黃花宜換世山林白髮欲專秋
莫言抱病妨盃酌漸喜新來絕酒讐

冰盤雪藕

清徹冰盤壓蔗漿酒酣雪藕進華堂凝寒色映瑤華脆
真白絲連翠袖香金掌曾聞承玉露瓊臺忽見擣玄霜
文園近日真消渴莫種蓮根引恨長

元日雪

朔雪遙憎毒霧蒸兩年元日勢憑陵氣吞鷗表城如玉

聲撼龍宮海欲冰不夜與天為汗漫當春借地示嚴凝
貂裘公子來何暮好向寒空縱角鷹

新正雨雪連綿人日大霧近午晴

天賜春晴一日恩亂來骨肉幾家存屢危豈望全腰領
積善當知及子孫喜有帆檣通白下幸無車馬到青門
往時百萬蒼生苦歲晚承平擬細論

中秋城西感興

玉宇瓊樓三萬里乘槎無路匪仙才塵揚海內衣冠盡

鴈斷雲邊鼓角哀天意未知何日定月華空似昔年來
故山老桂無消息紅蓼花高滿路開

雨困簡張梅間

濕薪萬竈漲烟氛屋角鳴鳩旦夕聞山接雲根如棧道
雨生波暈似犀紋麥苗泥漬連千頃花信寒消到幾分
最苦相從巷南北掩牕十日斷論文

和前韻

天氣渾疑挾楚氛雨淫愁向早春聞紅淹小圃違芳信

綠泛回塘亂縠紋
遠樹烏飛村舍沒
淡烟人立野橋分
空餘落墜隣翁壁
顛倒蝸涎似篆文

紀事

八月十五日告示
詰朝往攻新安孫
本立晡時羣黨爭
出城中撞擊居民
門戶壕外縱掠水
東永和邊江而上
放火殺人劫取財
物婦女火達旦不
滅是夜白氣亘天

橫亘東西白氣升
喧傳入夜事堪驚
縱焚傳刃連村市

流血呼冤逼郡城
天地豈忘心惛怛
山河未放影分明
提攜婦女閨房秀
飲涕羣驅敢出聲

和青華道士蕭宗元

月滿虛堂奏帝歸
仙風吹送紫雲衣
九還欲致三花聚
一悟能消萬劫非
老樹鶴棲存夜氣
清池魚躍見天機
黃冠況得山陰客
未信詩盟與願違

九日

未霜白鴈渺關河
來日空隨赴海波
世難持身高處怯

秋聲入耳老來多山中甲子今誰在日下長安柰遠何
幾度西風餘破帽悠悠心事唾壺歌

和劉子贄韻

夢中走馬上西涼回首燕山六月霜尚想築臺惠郭隗
誰能薦士效田光三陟吳楚人才劣百戰河山事會長
賴有淮南招隱處掩牕清晝坐焚香

立秋

京洛風塵竟未休送迎馬上敝貂裘蕭條人物常如夕

慘淡乾坤又入秋
勅使經年遺北府
戰場近日在南州
紛紛雞鶩羣爭食
誰向滄江友白鷗

寇來自北見城中蕭然散入村落

斷鴈雲低欲度遲
鵲巢何許寄南枝
寇兵已厭空城住
官馬猶從間道馳
萬骨白邊寒月夜
孤烟青處夕陽時
經年北道無消息
望眼頻穿淚暗垂

幽憤

隴梅驛信杳如緘
白晝連山霧氣酣
細柳未應全灞上

藍田自可轉關南驚濤四面輕帆破疑路千條老驥諳
落落懷才宜不少冥冥當局得無慙

詔至

三月二十六日天詔自廣東來詔發京師去年八月
二十七日也於是朝廷號令久不聞矣欣幸之極敬
賦七言律詩一首

沈陸如雲跬步艱忽傳驛信自燕山九霄日御龍光起
萬里春乘海道還忠義銘心扶壯節老癯垂涕洗愁顏

中原黎庶知何似想望疏恩溥荆管

次韻劉道原九日

曠劫何當洗壘埃凌高欲藉海為杯
巫山雨暗猿相引汾水雲深鴈不來
新釀偶憑茅舍漉寒花時向槿籬開
仲宣幸有荊州託未厭吟邊數往回

喜東宮受冊

六月二日東宮受冊越八日大赦天下使臣出湖廣
來自茶陵十月十有一日到郡踴躍快覩不覺情發

於聲忘其為老病也

海色穿林曉夢圓戰塵氛霧一時湔青宮德進瑤編紀
紫禁恩隨玉漏傳洛邑車書符永世漢家日月觀中天
秋霜一寸丹心在稽首洪禧萬億年

全叅政九日宴僚佐城西神岡叅謀萬德躬賦
詩五首用韻寓情

畫省凝香被羽林賞心寧許二毛侵閭閻側聽歌謠起
父老爭看榮戟臨霜露黃花留歲晏江湖白鴈待秋深

宴闌歸騎營門夕涼月紛紛落醉襟

能賦登高幕府親深秋過雨絕飛塵山城驛路黃柑富
水寨人家白粲新歌舞多非前日境交游半是異鄉人
通商近喜官鹽集不比西都巧笑緡

如雲冠蓋此高攀千載龍山季孟間犀筋駝峰傳翠釜
銀罌春色照蒼灣歌姬擁醉翻腔誤才士爭先覓句艱
祇有相如欣授簡興來無物不相闕

蘭臺無分珮珊珊斷壘平岡自往還避地亂來猶有酒

放懷高處不須山，叅差紅樹西風外。
明滅青烟落照間，何日遠尋方外友。
却隨紫氣出函關。

曾向凌波賦襪塵，絕交近日愧錢神。
百年撫事皆陳迹，四海知心幾故人。
山借衣冠違世濁，天留萸菊貸秋貧。
偶尋五柳先生傳，自覺年來懶是真。

懷古

關河渺渺幾浮沈，落日秋風萬古心。
二頃留人輕六國，一壺玩世重千金。
亂來耆舊傳聞泯，老去英雄悔恨深。

輸與蘇門長嘯者不教車馬浣山林

贈張梅間

故人誰似此君賢涉難交情晚更堅迂路出城尋故友
移牀就月話當年霓裳曲奏忘天上博望槎回記海邊
歸去蓴鱸隨地有別來鬚鬢得秋先

九日遣懷

繞籬黃菊自幽香無復龍山落帽狂身外老來從襍選
眼前高處倍淒涼妖狐哭過荒城雨旅鴈冥飛絕塞霜

風物關心倦回首野園柑熟旋分嘗

還鄉初度辱親友劉廬南惠詩依韻答之

憔悴還鄉一病翁
雪牕晴透校叅同
庚寅俛誦湘纍語
甲子長懷晉士風
塵暗衣冠情索莫
眼青骨肉誼深崇
新吟多謝耆年頌
晚節終慚老圃容

至正十二年壬辰正月武昌失守

黃鶴樓前帝子宮
古來形勝控江東
運籌要害無豪俊
流禍顛厓揔寇戎
天馬西來勲可樹
河冰北渡驛誰通

一壺或負千金重白髮丹心愧少同

述懷二首

子月中旬以後雨雪交作羣寇合攻大坑荆山小水
逆黨出城南三十里立砦二十四日破白水塘二
十五日破吾里吾與次兒長孫寓歷村下牢是日省
都事吳軍已到郡二十六日走度嶺者相屬如繩過
午猶不得家中消息心甚憂薄晚長兒來乃知念五
日四更初寇掩出吾里兒曹隨衆走厚富向晚寇退

渡江趨王屯暮抵南阜李氏已空室矣二十六日早
中宵蓐食行至高臺嶺巔但見連延朱村大坑寇火
千炬雪凍道滑婦人稚子僵仆不能進扶挈度大湖
嶺出章坑天已晚長女母子無托與偕來闔門不自
意全遂投下牢依陳氏暫住述懷二章

寇陷吾鄉今二日連宵列炬似星分如何去此三十里
家中消息杳無聞咫尺干戈皆逆境連綿雨雪助妖氛
兀坐此身同槁木恍然不復辨朝曛

風雪爐存半死灰
每聽人語輒驚猜
眼穿屢揖親知問
愁極忽傳兒子來
足繭荒墟烟慘澹
魂飛間道石崔嵬
經過且勿談辛苦
闔室無虞已幸哉

默念

末路危機逐日新
遭逢瞬息異冤親
多疑忍事甘存拙
久亂全生幸處貧
北海牧羝宜反漢
東門牽犬竟亡秦
古來反覆無前筭
那得匆匆論世人

書所見

正月十八夜全叅政軍中告變縛致都事哈喇台小
鎮撫阿爾斯蘭布哈萬戶張定住將戮之十九日昧爽
其麾下擁衆扼全舟脅取二人入城閉關縱兵大掠
全由此失勢四月二十七日吳員外部將明塔布台
潛蓄異志忌同列林巴延烏都臬勇挾詐殺之誣以
謀反吳不能制又叅政軍令喪馬一足償白金一百
兩是蓄不戰之馬也

百金戰馬廐中屯部伍酣歌徹曉昏牙帳黑風梟突起

營門白晝虎相吞
史徒富躡官曹位
廝養威聯士族婚
天下紛紛寧有此
我軍成敗不須論


記憶先親復齋先生詩二首

九日初度先父生宋淳祐己酉九月九日

厄於陽九畫成乾
淳祐遺民自憮然
正則庚寅宜有字
絳人甲子已忘年
菊枝偶地存幽操
汗簡何心理舊編
賴有童孫初學語
挽衣爭果戲階前

代李季實賀歷塘劉所立生日

春入霞杯喜拂天初逾六六紀瑤編人間銅狄何時鑄
天上銀蟾昨夜圓六月十日秋水精神高六月仙人風骨
妙千年山林城市遙相祝凝望蓬萊隔紫烟



石初集卷四